

PRESENTACION

Per entemenar la seria *Contes e Poèmas del Roèrgue* vos presentam ASUÈLHS REGUÈRGUES de nostre felibre majoral Zefir BÒSC.

Se sap que Zefir Bòsc calinha remirablament la Musa encantarèla de la poesia. Enfant d'Entraigas, ajent trimat per ganhar sa vida de jovent sus las tèrras de Viadena e d'Aubrac, coma suls costals de la Valòia d'Olt; a magnificament cantat son país nadalenc dins un primièr recull, AL CAIRE DEL TERRADOR, coronat pels Jòcs Florals.

Del prigond de son còr sorgis aquela seconda mena, ASUÈLHS REGUÈRGUES, que se poiriá tradusir “ Horizons austères ”.

Lo present recull piquèt al còr de la jurada de l'Escola Jaufre Rudèl de Bordèu, que li decerniguèt son Prètz de 1980.

Lo Majoral Joan Monestièr, President de l'Escòla, en li remetent lo Prètz, li diguèt bonas paraulas que nos plai de rapelar aici:

— Dins l'obra de Zefir Bòsc regema tota l'ama del vièlh país e tot l'esper d'una raça que regrelha. Amb son biais sens parièr, Bosc se dèu de sègre lo camin dubèrt per Mouly, Boudou, Vaylet, e tantes d'autres.

Dins ASUÈLHS REGUÈRGUES, a volgut cantar aquel país rufe, aquel terrador aimat. Per aquela poesia blosa es vengut a l'encantament de la beltat.

Quand legissi sos vèrses, tòrni dins aquela valòia de la ribièra d'Olt, ont sembla que lo temps se pausa, dabans lo pas etèrne del campèstre, ont bufa devals puèches lo vent de l'esper que brèça los sòmnis del poeta gardant la fe dins l'an que ven.

La trèva canta pas pus al gorg del riu, mas un òme de nòstre temps dis sa volontat de viure sul pairinal.

Majoral Joan MONESTIÈR